

英兵入藏論下 錄民立報

西藏者。世所稱爲秘密國也。雪山高峻。氣候寒沍。周圍六十餘萬方里。當亡清時代。上而政府。下而國民。皆以化外視之。曾不復一過問。重以國人素無冒險性質。雖以布達拉什倫布諸地之饒沃。亦復裹足不前。凡若此者。皆不知西藏對於中國本部之關係也。昔者黃帝。率其子孫。下帕米爾高原。迤邐而入內地。治史學者類能言之。是西藏一隅。實爲漢族發祥之地。漢書舜竄三苗於三危。其地卽今之後藏。隋唐間始建國爲禿髮。後又訛而爲吐蕃。唐太宗時。以文成公主尙其王噶木布。由是而降。迨於元明。交通日頻。接觸日近。是西藏與吾國之歷史有密切之關係也。且其地界居中印二國之間。答摩出世。大乘東來。實以西藏爲轉輸之所。吾國佛經中有所謂三藏十二部者。藏中皆有唐古忒文別本。故吾國呼佛經爲藏經。是西藏與吾國之教宗。又有密切之關係也。夫中藏之關係既如此。而吾國昔日顧漠然視之。蘊寶於地。棄而不取。必爲外人所覬覦者。又勢之所必至也。光緒十五年。以爭界之故。英人出師入藏。清政府派駐藏幫辦大臣升泰爲全權。卒與英人訂劃界之約。承認哲孟雄歸英保護。而第三款又加入藏哲通商一條。是爲英人侵略西藏最初之歷史。夫英人之所爭者。以界務也。以劃界生交涉。自當仍以劃界爲結果。乃升泰無端受英之愚。加入通商一語。本約既定之後。英人乃借口於要求規定通商交涉諸事。至

光緒十九年。何長榮赫德與保爾會締結藏印續約九條。而中國一切主權。益爲英人所攘奪。西藏本部游牧。亦大受影響。於是藏人始有輕視中朝之意矣。至光緒二十七年。駐藏大臣有泰。因英人揚赫斯鵬率兵入藏。復締新條約。西藏土地。乃隱然全體劃歸英國範圍。夫西藏自乾隆五十九年內附後。確然爲我外藩。無所疑義。既爲我之藩屬。英人開釁於西藏。卽不啻開釁於我國者。又當然之理也。乃有泰不知國際法。竟以和事老自居。而中國幾成爲局外中立國。開門揖盜。咎無可辭。由是以談。西藏之交涉問題。一誤於升泰之誤許通商。再誤於何長榮之喪權失利。三誤於有泰之麻木不仁。夫英人之所以欲與西藏通商者。以欲得西藏爲己有也。所以欲得西藏者。以西藏一爲英有。彼其野心乃得遂。自非洲南方築一大鐵道。起點埃及。由波斯達印度。入前後藏。下四川。通滇緬。以大展其雄圖也。英人對於西藏。已在在有反客爲主之勢。今後乘我內亂。藉口進兵。失此不圖。後悔奚及。爲今日救急計。惟有迅速派兵。剿滅亂衆。保護英僑。再由唐總理根據光緒三十二年條約。與英使力爭。唐久任外交。往年磋商藏印續約時。令英認我主權及承認春丕撤兵二事。實由唐主持之。今令其出而折衝。或可補救。事定之後。再改西藏爲行省。實行政教分離。築川藏鐵路。以利交通。興江孜工藝廠。以興實業。徙南方兵隊。開墾伊庫山察穆哈爾諸地。一以鎮番衆。一以興地利。乘民國成立之機。與英協商。將舊約中喪失權利之處。逐漸修改。以收回

主權。庶可爲桑榆之補。嗟我政府。嗟我國民。其亟起而圖之哉。

各國務員之政見 五月十三日在參議院宣布

(一)唐總理紹儀

前次紹儀等隨大總統蒞滬貴院時。蒙大總統宣示政見。於財政實業軍事法律外交諸端。均已包舉。尤所諄諄者。曰建設從穩健入手。措置以實事爲歸。紹儀等自當本諸大總統之政見。以爲措施之方。當此建設肇始。經緯萬端。紹儀等忝任國務。夙夕以不克負荷爲懼。審度現狀。至艱且鉅。惟分別其先後緩急。而後措施有所根據。謹布其愚。候諸君教。

我國土宇廣大。二十二行省。與蒙藏諸邊地。舊習相承。未能一旦化除。固難以一種制度統治。然軍民分治。黎副總統倡議於前。大總統贊成於後。紹儀等按之東西各國。皆持此法以爲治。行之久遠。因進於強盛之域。我民國自當引爲導師。紹儀等擬本軍民分治之意。期漸舉行行政統一之實。因時因勢因地。施合宜之地方制度。

軍興以來。各處增兵。以厚勢力。軍隊不免繁多而複雜。循此不變。不獨人民之擔負。有加無已。抑地方秩序。亦無從保其安寧。現已由參謀部陸軍部籌畫善後方略。務期按切全國形勢。統一軍政。簡選精銳。加以訓練。整飭紀律。俾成勁旅。庶餉糈不致虛糜。而國防因之鞏固。

外人對我之態度。皆以保守和平爲宗旨。今日痛定思痛。宜深感謝各友邦之懇誠。今後當益敦睦誼。推誠相與。維持東亞和平之局。從前清廷所訂各項條約合同。自應切實履行。以彰信用。

改良法律。建設獨立司法制度。普及教育。統一幣制。整頓金融機關。振興實業。發達交通等事。亦當以漸進主義。次第推行。

目下尤爲緊急者。厥爲財政。往年歲入。號稱有二百九十餘兆。自軍興以來。迄今七月。各地消耗之費。已數倍之。現雖全國統一。而農廢於野。工荒於肆。商賈滯於途。求有敷於政府所規畫之用。茫然無所取給。如租稅公債金融等事。皆關於財政之最要者。而又緩不濟急。故不得已。惟擬輸入外債。以救急需。迭經財政總長與各國銀行團。竭力磋商。尙未達正確之解決。俟有成議。再提交貴院決議。至於借債之條件。則政府確信其必爲正當。不至有損害權利之事。雖然。籌借外債。固以救目前之急需。又必自有切實之預備。方能爲繼。已由財政部編製決算。結束以前之支出。編製預算。規定以後之支出。必守節約主義。令支出之款。皆屬正當之用途。然僅恃外債。仍不能使我國財政。復見生活之機。就目前方法而論。尙應有國民捐國庫券等項。以爲運轉之樞紐。則於租稅貨幣銀行實業等事。方可籌畫整理之策。次第勵行。否則急無已時。而救急之術。亦難爲繼也。